

Adina pli grev d'occupar plazzas d'emprendissadi

■ (rtr) **La Surselva è la regiun en il Grischun che ha actualmain las plibleras plazzas d'emprendissadi ch'èn libras.** Ina pitschna retschertga da RTR tar la gastronomia, hotelaria e la bransch da construcziun mussa ch'igl è cunzunt la depopulaziun che procura che la dumonda sunter plazzas d'emprendissadi è sa sminuida massivain ils davos onns. *Annalisa Giger* dal Hotel Alpsu a Mustér deplorescha ch'ella n'ha betg pudì occupar la piazza. In pro-

blem en quest senn n'èsi dentant betg.

Ella ha simplamain engaschè students che vulan gudagnar in pèr daners durant la stad. Tenor *Fabia Caduff* dal Hotel Central a Sursaissa èsi uschia ch'ella n'ha betg gi annunziadas per las plazzas che correspundevan al giavisch. Tenor ella pudess dentant era la regiun periferica esser in problem. Giuvenils da citads na tshertgian betg gist lieus d'emprendissadi en questas regiuns.

Pli problematic en il sector da construcziun

Tar la bransch da construcziun èsi a lunga vista in problem sch'ins na chat-ta betg emprendists, declera *Guido Friberg* da la firma Loretz SA a Sedrun. Per avair en il futur glieud qualifitgada per lur fatschentas ed era per il cader da questas stoppian els pudair scolar nova glieud. Quai conferma era *Daniel Blumenthal* da la fatschenta da construcziun Valaulta Berni SA da Rueun, e president da l'Unìun d'impressaris da la Surselva.

Daniel Blumenthal è dentant era da l'opiniun che las fatschentas sezzas sajan in pau la culpa che las plazzas d'emprendissadi en questa bransch n'èn betg uschè tshertgadas. I procura per malsegirtad e na motiveschia betg gist da vulair imprendier in dals mastergns en la bransch da bajegiar sche las firmas communitgeschian adina mo ch'i stettia mal en la bransch e ch'ins stoppia relaschar collavuratur. El è dentant persvas che cun il mastergn da miradur han ins anc adina bleras pussaivladads da sa scolar vinvant, ed uschia er in bun avegnir en la Surselva.

Radund 600 plazzas betg occupadas

En il Grischun n'èn tenor indicaziuns da l'uffizi per la furmazion professiunala actualmain enturn 600 plazzas d'emprendissadi betg occupadas. Passa 100 da questas èn en la regiun da la Surselva.



Emprendist da miradur a chaschun dal Campiunadi svizzer da masterants.

FOTO G. HOSANG